



KETE MANARUA

Te Ao Haka 2024


91978 Te Whakaatu māramatanga ki ētahi wāhanga o roto o Te Ao Haka

WHIWHINGA: 5

91979 Te whakaatu māramatanga ki ngā huānga o roto i tētahi

WHIWHINGA: 5

Ka tūwhera a 'MyNZQA' ki te tuku i te Kete Manarua hei te 30 o Oketopa.  
Ka kati a 'My NZQA' hei te 30 o Oketopa, 2024



*“Nau Mai  
e ngā hua  
o Tānerore,  
o Hine-Rēhia...”*

# Ngā Ihirangi

He Kupu Whakataki	4
Tūmahi Aromatawai (91978)	6
Tūmahi Aromatawai (91979)	10



# Kete Manarua

## *Ka maka te pakapaka, ka ohu te karoro*

**Kete** - ko te kete i pū mai i te pā harakeke me tōna whakapapa.

**Manarua** – e rua ōna mana. Tuatahi, ko te mana o ngā taonga ka kohikohia me ngā mahi huhua ka whakatutukihia e te ākongā. Tuarua, ko te mana o te ākongā, ko tōna whānau, hapū, me tōna iwi hoki, ko tōna ake mana motuhake tonu.

## Te Motuhēhē o ngā mahi

E taea e koe te ako ngātahi, te mahi ngātahi rānei i ētahi atu tangata hei kohikohi kōrero i ngā puna tautoko huhua. Heoi, me mātua mōhio nei te Pouako, nāu anō ngā mahi i whakarite, i whakatakoto.

Hei akiaki tonu i te hāponotanga o āu mahi katoa me whakamahi anō koe i āu ake kupu, ka mutu, ka kaha hāpai i ngā tikanga tohutoro e whakamana anō ai te puna o te mātauranga.

Mā te mihi e whakaatu, e whakanui hoki i ngā tāngata me ngā puna awhina i puta ai āu nā mahi. Hei tauira:

- He rerenga kupu poto e tohu ana i te pūtakenga mai o tētahi kōrero;
- He rārangi tohutoro i te whārangi whakamutunga o ngā mahi;
- He mihi ki te tangata | puna awhina;
- Ngā momo puna awhina, puna kōrero rānei:
  - » Kōrero ā-waha: he uiui kaumātua, pakeke, rangatira, mātanga rānei;
  - » Ngā pukapuka i whakaputa;
  - » Ngā pukapuka kāore i whakaputa;
  - » Wāhitau ipurangi.

## Te Tāpae i te Kete Manarua

Ko ngā tāpaenga Kete Manarua me mahi mā te pūnaha hou (kei te pae ipurangi matua o MyNZQA): [Tāpaetanga pūnaha hou NZQA](#).

E pai ana te tāpae mai i ngā taunakitanga hei kōnae matihiko, ahakoa kōnae oro, kōnae ataata rānei, hei PDF kē rānei, hei kōtuinga rānei o ngā mea e rua. Me he taunakitanga ā-pepa, me matawai, ka tuku ai hei PDF. Me whakakī anō hoki e te Kaiako te Pukauhi Kete Manarua mō ia kōpaki Kete Manarua ka tukua kia aromatawaia.

Māu anō āu mahi e tukuatu i te tuatahi. Tēnā, matakia te ataata, tikiake rānei i ngā tohutohu e whakaatu ana me pēhea te tuku atu i ngā tāpaenga Kete Manarua mā te pūnaha hou [[How-to Resource](#)].

Mēnā kei te hiahia āwhina ki te tuku atu i ngā tāpaenga Kete Manarua, tēnā, kōrero ki tō Kaiako, ā, māna koe e awahi, e tautoko.



*Māori Woven Artwork.* Photo credit: Rafael Ben-Ari. Adobe stock (#67581275).



# TE AO HAKA

91978 Te Whakaatu māramatanga ki ētahi wāhanga  
o roto o Te Ao Haka

(Kaupae 1, WhiwHINGA 4)

Kairangi	Kaiaka	Paetae
Te tātari i ētahi wāhanga o roto o Te Ao Haka	Te whakamārama i ētahi wāhanga o roto o Te Ao Haka	Te whakaahua i ētahi wāhanga o roto o Te Ao Haka

# Tūmahi Aromatawai

## Te Whakamāhukitanga

Me whakaatu e te tauira kia rua ngā tūngaā e whakamārama ana i tōna mōhio me tōna mārama ki ngā Wāhanga o tētehi Pekanga o Te Ao Haka. Me tīpako e te tauira kia rua ngā wāhanga o tētehi pekanga, ka whakaatu, ka tuhi mai i tōna mōhio me tōna mārama ki aua wāhanga e rua.

## Ngā Tohutohu

Ko tā te tauira i te aromatawai nei, he tuku whakaaturanga, he tuku whakamāramatanga anō e whakaatu ana i tōna mōhio me tōna mārama ki ngā Wāhanga o roto i ngā Pekanga o Te Ao Haka.

## Whakatakotoranga Aromatawai

E rua ngā tūmahi mā te tauira:

- a. He whakaaturanga mō ngā wāhanga poi e **RUA**, ngā wāhanga haka e **RUA** rānei.
  - **Whakamahia** i ngā tūnga i tū ai ia mai i te tau 2023 – 2024, ahakoa tōna momo.
  - **Rikoatahia** ko ia me tōna kotahi, ko ia me ētehi atu rānei mō te pūtake o te aromatawai nei heoi, e whakaae ana hoki kia whakamahi i ngā tūnga whakataetae ā- rohe, ā- motu, Ahurei me Te Matatini i tū ai ia.
  - Me kua e roa ake i te toru miniti ki ia wāhanga, me kua rānei e iti iho i te 2 miniti ki ia wāhanga.
  - Hei whakamōhioatanga atu: Mō ngā tūngaā e rua, me rerekē ngā pekanga eēngari me ōrite te wāhanga, hei tauira:

Poi: Tūnga 1 – Kia rua ngā poi poto  
Tūnga 2 – Kia rua ngā poi waeroa

Haka: Tūnga 1 – Haka Taparahi  
Tūnga 2 – Ngeri

- b. He wāhanga whakamārama i ia Wāhanga Poi, Haka rānei, he whakatakoto hoki i ētehi ritenga, i ētehi rerekētanga anō kei ia Wāhanga Poi, Haka rānei.
- He wāhanga hei whakamārama i te Poi/Haka, tōna kaitito, nō whea taua kaitito, te tau hoki i titoa ai taua Poi/Haka.
  - He whakamārama i te momo o te Poi/Haka, me ngā ritenga/rerekētanga ki te Poi/Haka tuarua e mahi nā koe.

## He Whakamāramatanga 1

*Whakamāramatia kia rua ngā pekanga nō te wāhanga kotahi mā te:*

- Whakaatu i ngā tūmomo e rua nō tētehi pekanga.
- Whakamārama i ngā whakaaturanga mā te tuhinga.

*Whakamāramatia mai kia rua ngā pekanga nō tētehi wāhanga mā te:*

- Kōwhiri kia rua ngā tūnga hei whakamārama me te whakatau mai i tētehi pekanga .
- Whakamārama i ngā whakaaturanga mā te tuhinga.

*Tātarihia hoki ngā tūmomo nō tētehi pekanga mā te:*

- Kōwhiringia kia rua ngā tūnga mai i tētehi pekanga hei tātaritanga māu
- Ruku hōhonu ki ngā whakamāramatanga mō ia whakaaturanga, me te whakatakoto i ngā ritenga me ngā rerekētanga o ia tūmomo.

## He Whakamāramatanga 2

E noho ana Te Tūmomo i roto i ētehi waiata/haka, ā, he nekehenga, he reo, he kupu anō tōna.

Ko te **Pekanga** e hāngai kē ana ki ngā wāhanga o Te Ao Haka

E whai wāhi mai ana ēnei i raro nei i te **Pekanga**:

- Mōteatea
- Waiata ā ringa
- Poi
- Haka, haka wahine
- Whakaeke
- Whakawātea



I tēnei tau, ka tīpakohia e te tauira ngā wāhanga mai te pekanga Poi, te Haka rānei hei tāpaetanga mahi mō ā rātou kōpaki mahi mō te tau 2024 (ka haere tahi tēnei me te horopaki TAPA).

## He Whakamāramatanga 3

- E wātea ana te tauira ki te tūhura i ngā horopaki rerekē o te poi/haka heoi me mārama, ko tētehi wāhanga e whai wāhi mai ana he Kaupapa e whakaatu ana i te ritenga me te rerekētanga ki tētehi atu.
- Ka taea e te tauira te tuku tūmahi i waenganui i te marama o Poutūterangi me Oketopa heoi, ko ngā mahi katoa me tuku ngātahi hei tāpaetanga kotahi i mua tonu i te 30 o Oketopa.

## Te Wetewete i te Paerewa

Ko tā te tauira i te whakamātautau Kete Manarua nei, he whakatakoto i ōna mōhiotanga me ōna māramatanga ki ngā wāhanga waiata/haka rānei i roto i ngā pekanga nō Te Ao Haka, ā, me ngā wāhanga motuhake o te whakaatu i aua wāhanga. Mā te whakaatu me te whakamārama i ngā wāhanga nei, ka kitea te whai wāhi atu o te tauira ki ngā akoranga motuhake o Te Ao Haka.

## Ngā Heipūtanga

Ko ngā taunakitanga mō tēnei paerewa kei roto i ngā whakaaturanga a ngā tauira. Ka taea tēnei whakaaturanga i mua i te marea, i tōna kotahi rānei.

Ka taea hoki ngā whakaaturanga kaupapa hāpori, kaupapa kura, whakataetae rānei mō tēnei paerewa. Me mātua mōhio nei te pouako, nā ngā Ākongā anō ngā mahi i whakarite, i whakatakoto.

Me tukuna mai ngā mahi i mua tonu i te **30 o Oketopa 2024**.



# TE AO HAKA

91979 Te whakaatu māramatanga ki ngā huānga  
o roto i tētahi whakaaturanga o Te Ao Haka

(Kaupae 1, Whiwhinga 4)

Kairangi	Kaiaka	Paetae
Te tātari i ngā huānga o roto tētahi whakaaturanga o Te Ao Haka	Te whakamārama i ngā huānga o roto i tētahi whakaaturanga o Te Ao Haka	Te whakaatu māramatanga ki ngā huānga o roto i tētahi whakaaturanga o Te Ao Haka

# Tūmahi Aromatawai

## Ngā Whakamāhukitanga

Me tukuna te tauira tētahi whakaaturanga e whakamārama ana i tōna mōhio me tana mārama ki ngā Kaupapa i roto i tētahi tū o Te Ao Haka. Me mōhio te tauira ki te whakamārama i ngā Kaupapa i ngā Kapa Haka e rua i tū ki Te Matatini i ngā tau 2000, 2002 me te tau 2005.

## Ngā Tohutohu

E hāngai ana te whakamātautau Kete Manarua nei ki ngā whakataetae o Te Matatini mai i te tau 2000 (ki Tūrangawaewae) Te Matatini mai i te tau 2002 (ki Takaparawha) me Te Matatini mai i te tau 2005 (ki Rangitāne). Ka noho ko te horopaki o tēnei kaupapa hei tūhura, hei wherawhera, hei whakamārama, hei whakamahi me te whakatauiria mōhiotanga o ngā Kaupapa nō roto mai o Te Ao Haka i tēnei tāpaetanga. Kei runga ipurangi Ūtupa ngā whitiata o ēnei Matatini e toru.

1. Me whiriwhiri te tauira kia **RUA** ngā Kapa Haka o ngā Matatini e toru. Me whakatau i roto i te aromatawai nei ko wai mā aua Kapa Haka e rua, ka mutu, mehemea he rauemi, he kiriata, he pikitia rānei ka whakamahia, me whai hoki ngā tohutoro.
2. Me tuku e te tauira tētehi **WHAKAATURANGA** e whakamārama ana i Ngā Kaupapa i kitea, i rangona i roto i tētehi Tūmomo nō ngā Kapa Haka e rua. Me kotahi te tūmomo nō ia Kapa hei whakamahi mai, hei whakamārama anō mai mā te tauira, (hei tauira, Te Waka Huia 2000 – **Whakaeke**, Waihīrere 2002 – **Whakaeke**).
3. Me mārama ki te kaiarotake ko wai ngā Kapa Haka e rua me ngā Tūmomo e rua kua whakamahia e te tauira.
4. **Me tīpako** e te tauira ngā **e RIMA** Kaupapa nō te rārangi Kaupapa kei tēnei aromatawai. (Kei raro iho nei te rārangi Kaupapa e takoto ana).
5. Pūruatia te moko, pūruatia te kiriata ki tāu e pai ai.
6. Me reo Māori katoa, me reo Pākehā katoa rānei ō whakautu, kia kaua e whakawhiti rua i ngā reo.

## He Whakamāramatanga 1

He āhuatanga motuhake ngā Kaupapa e noho mai ana i roto i te tū, heoi kaore i whāiti ki te horopaki o Te Ao Haka anake.

Whakamahia ngā Kaupapa kei raro iho nei mō āu whakautu:

- te wāhi - *space*
- te huahuatau - *metaphor*
- te hanga - *shape*
- te ōrua - *harmony*
- te horopaki - *setting*
- te tirohanga - *point of view*

## Whakatakotoranga Aromatawai

Me kōwhiri e te tauira kia kotahi te Pekanga i ngā Kapa Haka e rua i tū ki Te Matatini, hei whakamārama mai i ngā Kaupapa i kitea, i rangona hoki.

Me whakautu haere te tauira i ngā pātai e hāngai ana ki ētahi Kaupapa e 5 kei roto i ngā Pekanga o ia Kapa Haka.

- Tīpakona kia RIMA ngā Kaupapa (nō te rārangi Kaupapa o te aromatawai nei) i whakamahia e ngā Kapa i roto i tana tū. I pēhea tā rāua whakamahi i ngā Kaupapa nei hei whakaniko i tana tū.
- Whakamāramatia ētehi ritenga/rerekētanga o roto i ngā Kaupapa e rima kei ngā Kapa Haka nei, he aha rānei i rerekē ai, he aha rānei pea i rite ai?
- Ko ngā Kaupapa kei tēnei aromatawai, he aha rā ia ngā kaupapa i motuhake kē ai, ā, he aha tōna pānga ki a koe, he pēhea hoki tō whakamahi i roto i tō ake kapa?

## He Whakamāramatanga 2

Me whakaatu māramatanga ki ngā Kaupapa kei ngā Kapa Haka e rua mā te:

- Whakamārama i ngā Kaupapa e rima i roto i ngā whakaaturanga e rua
- Whakatakoto whakamāramatanga mō ia Kapa Haka

Me whakamāori i ngā Kaupapa kei ngā Kapa Haka e rua mā te:

- Whakatau i ngā āhuatanga motuhake i roto i ngā tū
- Whakatakoto whakamāramatanga mō ia Kapa Haka

Me tātarīhia ngā Kaupapa kei ngā Kapa Haka e rua o Te Matatini mā te:

- Whakataui i te pai o te mahi-tahi o ngā kaupapa kia puta ai he hua
- Tātari i te whakamahinga o ngā Kaupapa e mārama ake ai te tikanga o te tū
- Whakatakoto whakaaro mō ia Tūmomo, me te kōrero ki ngā ritenga, ki ngā rerekētanga anō hoki.

## He Whakamāramatanga 3

Ko te Pekanga e hāngai kē ana ki ngā wāhanga o Te Ao Haka. Ko ngā Pekanga e rārangi iho nei:

- Mōteatea
  - Waiata ā ringa
  - Poi
  - Haka, haka wahine
  - Whakaeke
  - Whakawātea
- Mā te tauira tētahi o ēnei Pekanga mō ia Kapa Haka, heoi me whakataui te tauira ko wai mā ngā Kapa Haka e rua, he aha hoki ngā Pekanga e rua ka whakamahia. Me haere ngātahi ēnei whakataui me ngā tohutoro e hāngai ana ki a ia.
  - E āhei ana te tauira te tīpako i te wāhanga ōrite mō ngā tūnga e rua hei whakataui māramatanga ki ngā Kaupapa. Ka tāea tēnei ahakoa pēwhea.

## Te Wetewete i te Paerewa

Ko tā te tauira mahi mo te whakamātautau Kete Manarua nei, he whakatakoto i ōna mōhiotanga me ōna māramatanga ki ngā Kaupapa o Te Ao Haka, ā, me tōna hāngai ki te ao Māori i te horopaki o Te Matatini mai i te tau 2000 ki Tūrangawaewae, Te Matatini rānei mai i te tau 2002 ki Takaparawhā, ka mutu ki Te Matatini i te tau 2005 ki Rangitāne.

Me wherawhera ngā tauira te tūāpapa o Te Ao Haka i te Taumata 1, mā te ako i ngā pūkenga whakaaturanga, ngā kōrero tuku iho me ngā taera whakawhanake o Te Ao Haka.

## Ngā Heipūtanga

Ko ngā taunakitanga mō tēnei paerewa kei roto i ngā whakaaturanga a ngā tauira. Ka taea tēnei whakaaturanga i mua i te marea, i tōna kotahi rānei.

Me takitahi te mahi i tēnei aromatawai, ā, me mātua mōhio nei te pouako, nā ngā Ākonga anō ngā mahi i whakarite, i whakatakoto.

Me tukuna mai ngā mahi i mua tonu i te **30 o Oketopa 2024**.